

Učešće na XXIII Kongresu

Međunarodne organizacije vrhovnih revizijskih institucija (INTOSAI)

Delegacija vrhovnih revizijskih institucija (VRI) BiH učestvovala je na XXIII Kongresu Međunarodne organizacije vrhovnih revizijskih institucija (INTOSAI) koji je održan u Moskvi u periodu od 25. do 28. 9. 2019. godine. Ispred Ureda za reviziju institucija u FBiH prisustvovali su Dževad Nekić, generalni revizor Ureda za reviziju institucija u FBiH i Mia Buljubašić, viši revizor za međunarodnu saradnju i komunikacije. Kongresu je prisustvovalo preko 600 delegata iz 168 zemalja članica.

Kongres je svečano otvorio predsjednik Rusije, Vladimir Putin, koji je istekao da „*saradnja, interakcija i razmjena iskustava između revizijskih institucija javnog sektora jedan je od ključnih koraka koji vode ka izgradnji povjerenja, predvidljivosti u globalnoj ekonomiji i finansijama, a osnova je našeg zajedničkog rada na prevazilaženju strukturnih problema, promicanju ekonomskog rasta, poboljšanju dobrobiti ljudi -poštovanje i zaštita okoliša - sva prioritetna područja koja su Ujedinjeni narodi identificirali kao ciljeve održivog razvoja*“

Cilj Kongresa bio je da se naglasi važna uloga vrhovnih revizijskih institucija za društvo. Vođena je diskusija o ulozi VRI u postizanju ciljeva država, uključujući i UN-ove ciljeve održivog razvoja, kao i o korištenju informacionih tehnologija u svrhu razvoja javne uprave.

Kroz dvije panel diskusije učesnici Kongresa bavili su se pitanjem makrorevizije i strateških izazova po globalnu ekonomiju i međunarodni razvoj, te pitanjem održivog razvoja u eri digitalizacije. Prezentirani su i izvještaji regionalnih organizacija VRI kao i radnih grupa INTOSAI-a.

Kongres je okončan usvajanjem Moskovske deklaracije, u kojoj se naglašavaju zaključci i ključne oblasti za dalji razvoj vrhovnih revizijskih institucija. Da bi se osigurala vrijednost i ostvarile koristi od revizije javnog sektora, VRI i INTOSAI moraju primijeniti nove pristupe u radu i iskoristiti prilike kako bi se suočili sa novim izazovima.

Kongres je bio prilika i za dalje razvijanje međunarodne saradnje, uspostavljanje novih kontakata i razmjenu iskustva između vrhovnih revizijskih institucija.

